



PM Modi-i party ajak senden
ayongtsü memelunger: Congress

West-i India aser China
toktepdaktsütsü meranger



75 buba Plebiscite Day nung Naga Declaration bangjemshiogo

Kohima, May 16, 2025 (TYO): Kohima nung aliba Khouchiezie Local Ground nung Hokolbarnü teintet rogotem, lanurtem aser tetsürtem pei pei sobaliba subotsü agir adenshia 75 buba Naga Plebiscite Day mungogo.

Naga National Council (NNC) kübok tanü Naga Plebiscite Day agir küm 75 abensaba bilemteta amung.

Naga nunger atema May 16, 1951 ya kanga dang tongtipang anogo ka lir kechiyong iba anogo Naga Hills nung Naga nunger meyrjang aikati shinga kübok masü saka linük balaka ama lia aotsü atema tezüngzüktepba agia liasü.

1951 küm Naga Plebiscite ya A.Z. Phizo aser NNC-i anir agia liasü aser iba anogo Naga nunger 99.9% ajanga Naga linük balaka lia aotsü pusema nungit. Iba sentong ya India sorkaribo magizük saka iba mapa ya Naga political movement asoshi tamendakdak ka ama züngshia arur.

Iba plebiscite ya meyongnem



May 16, 2025 nü Khouchiezie Local Ground, Kohima nung 75 buba Naga Plebiscite Day amungdang teintet rogotemi Naga wako amer shilem agiba angur.

agüja agia liasü aser iba senmang tanü tashi akhümtsüba arur.

May 16, 1951 nü Naga plebiscite nung shilem agirtem rongnung Chakhesang region nungi Putha Tunyi aser Angami region nungi Siesa Yano na tanü sentong nung aden. Tenaprong ya arishi küm 100 ajungtsü ana nung lir aser tena lanur asüdang

plebiscite nung shilem agia liasü.

Iba sentong nung Naga national anthem "God Bless Nagaland, Land That I Love" aten aser Tsüngrem dang nungi temoatsü meshia sarasadema tenzü.

Tanü sentong nung nisung 11-i A.Z. Phizo ajanga 1951 küm jembiba onük zünga sayu. Tazüngertem rongnung Rev. Tsohie Chase aser lanur kaketshir Lumrito Khipur nunger dena liasü.

"India-i ochi ajanga takok angur ta amanger süra Naga

nunger maitsü aser nüjiso nüngdakba ya miimbanga meytettsü. India-i national state of Nagaland senzuka yutsür Mahatma Gandhi, non-violence aser democracy indang jembia moutettsü" ta Phizo-i 1951 küm ashi.

"Onoki 1951 mangu saka iba senmang amanga lir. Tanü ya angazükba aser tesüiba nem tetushi agütsüba mapang ka lir" ta Angami Youth Organisation president Kesolsul Christopher Ltu-i osangbener dang ashi.

Tanü sentong nung

adenertemi Naga Declaration nangzükshiogo aser original plebiscite nung ajemdaktsü bangjemshitepogo.

"Iba otsüsütsü anogo nung onoki Naga nunger longjemba aser külemi talenba maliba linük ka ama linük ka asütsü bangjemshir. Onoki May 16, 1951 nü Naga Plebiscite nung sotsü aser linük balaka ama alitsü akangshiteper" ta sentong nung adenertemi külemi tezüngzüktep agi.

1951 plebiscite ya Naga National Council (NNC) ajanga dang ketdangsüa agi saka iba sülen Naga political movement telok balala loksaa ogo. India sorkar den yimtenren olemtep nung NNC madener.

NSCN-IM-i 1997 nung ceasefire tenangzüktep agi aser 2015 nung Framework Agreement nung sign sütep saka tanü tashi Naga wako aser temzüng takhangba ajanga olemtep metembangeti lir.

Külem, Centre-isa 2017 nungi Working Committee of NNPGs den jembishinütsü tenzü aser kasa küm Agreed Position nung sign sütep. NSCN-IM ama masü WC NNPGs-ibo mapang lemsar yimten latettsü mulunga lir.

Nagaland nung PMAY-U kübok mapa 93% inyakogo

Kohima, May 16, 2025 (TYO): Department of Urban Development and Municipal Affairs, GoN-i Pradhan Mantri Awas Yojana - Urban (PMAY-U) mapa junga inyakba nüngtem nung kakat ka sayaogo.

Hokolbarnü "Transforming Lives: A Glimpse at Pradhan Mantri Awas Yojana (Urban) Mission in Nagaland" ta ser coffee table book ka sayaa liasü.

Hotel Vivor, Kohima nung sentong ka ayonga agidang Nagaland nung küm 9 tashi "Housing for All" nükjidong kübok inyaka aruba osang lemsatop.

Iba sentong nung Municipal Affairs and Urban Development Advisor Zhaleo Rio aden aser pai coffee table book sayatsü.

"Nagaland nung ki 29,973 yanglutsü lemezüksüba nungi 27,806 yangluogo aser iba ya 93% completion rate lir" ta Zhaleo Rio-i ashi.

"Northeast nung iba mapa takok ngua inyakba state tem rongnung Nagaland densema aliba atema nüma atanger. Tanüngba units ji kar tang teyangludak mesüra technical khuret ajanga anendaka ayurtem lir" ta pai ashi.

PMAY-U ya Ministry of Housing and Urban Affairs ajanga 2015 küm tenzü aser 2025 tashi ataülango. Iba scheme ajanga economically weaker sections (EWS), low-income groups (LIG), aser middle-income groups (MIG) nem ki yanglutsü teyari agütsür. Nagaland nung iba scheme ya

statutory towns 32 nung inyaker aser ano towns 7 enoksemtsü mapa inyaker aser additional 10,000 units yanglutsü shidangogo.

Tanü sayaba coffee table book nung iba scheme ajanga temelenshi bener aruba, tatalokba otsütem, noksatem aser state tesem balala nung terenlok aliba indang shia lir.

Iba scheme kübok beneficiary temi Rs 1.5 lakh dang angur saka pei akaba rongsen amshia ki tajungba yanglutetogo ta ketdangsürtemi ashi.

"Iba ya sorkar teyari dang masü saka nübortemi takok ngudaktsütsü tenangzükba nung inyakba ajanga lir" ta ketdangsür kati ashi.

Tanü sentong nung PMAY-U technical teams-state aser city-level-i meranga inyakba atema tenüngsang agütsü. Parnoki Urban Local Bodies 32 prong nung field visits aser documentation mapa inyaker.

"Iba kakat ajanga terenlok aliba kuli agütsütsü, khuret ajangtetba aser taginüba atongba otsütem ashitsü" ta Commissioner & Secretary, Municipal Affairs and UDD, Kekhrievor Kevichusa-i ashi.

Iba sentong nung Peraciezie Baptist Church Kohima Pastor Rev. Dr. Kevichalie Metha-i temoatsü meshia sarasadem, TRUISM-i ken ka aten aser Joint Director & HoD Municipal Affairs Department, Temjenrenla Kichu-i anküp tepela o jembii.

RPI (A)-i Meetei nunger ST List nung dendaktsünür

Imphal, May 16, 2025 (Agencies): BJP-i aniba Centre sorkar nung yariteper Republican Party of India (Athawale)-i Manipur Governor Ajay Kumar Bhalla dang Meetei/Meitei nunger national Scheduled Tribe (ST) list nung dendaktsütsü shiogo.

RPI Athawale Manipur state unit President Maheshwar Thounaojam-i Hokolbarnü Raj Bhavan nung Governor Bhalla den ajuruteper aser iba mapa inyaktsü atema memorandum ka agütsü.

Governor-i iba onük süoki ia bilemer aser Centre dangi recommendation yoktsü akok ta

Maheshwar-i osangbener dang ashi.

British administrator W.H.T. Hodson-i 1908 nung The Manipur ta ser ethnographic report ka agütsüba nung Meitei nunger ya Manipur nung lisopur kintem rongnung ka lir ta ashiba Maheshwar-i nenshia ashi.

1921 aser 1931 British India census report tem nunga Meitei nunger ya primitive tribes ta züngsema lir aser Scheduled Tribes category nung dendaktsü ta paisa ashi.

"Ajisüaka 1951 nung Constitution of India yanglur

benshi tenzükdang ketdangsürtemi ST list nungi Meitei nunger agien. Manipur ya 1891 nungi 1947 tashi British yimsüsüba kübok denaka 1949 nung Indian Union nung maden tashi yimli balaka liasü" ta Maheshwar-i osangbener dang ashi.

Manipur nung President's Rule benoka aliba mapang ka kechiba RPI (A)-i takhangba agütsür ta osangbeneri asüngdangdang "Meitei/Meitei nunger national ST list nung dendaktsütsüba ya ozü party atema tongtipang teinyaktsü ka lir" ta Maheshwar-i langzü.

CSU-i tanü nungi lungkak aitba shilem 3 buba tenzüksü

Kohima, May 16, 2025 (TYO): Phek district nung Chakhesang Students' Union (CSU)-i Honibar nungi lungkak aitba shilem tasembuba tenzüksü metetdaksüogo.

29-kilometre Kohima-Jessami Road (Package-II) mapa shitak meinyakba atema parnoki lungkak aiter.

Iba mapa meinyakba atema CSU-i taoba nung National Highways & Infrastructure Development Corporation Limited (NHIDCL) aser EPC

contractor, M/S Ratna Infrastructure Project Pvt. Ltd. nunger gari mesenzüdaktsüi lenmang noktanga liasü.

Parnoki aiben shiditem zülua aruaka aser May 2, 2025 nü anogo züngzüksüba sülen iba mapatong nung mapa inyakbamong majiteter ta CSU-i ashi.

Parnoki May 10 nü Kikruma village nung lungkak aitba sentong ka agia liasü.

Hokolbarnü CSU senden ka

amendang lungkak aitba shilem tanabuba anenogo aser Honibar nungi shilem tasembuba tenzüksü aser iba mapang wako tanak amshitsü ta metetdaksü.

"CSU-i akhangba ama meinyak tashi onoki lungkak aittsü" ta president Pfhulo Sara-i ashi.

CSU-i lungkak aitba shilem tanabuba agidang NHIDCL aser EPC contractor meyong gari 12 tashi apu aser itemji tanü agütsüogo.

Nagaland nung PMAY-U shilem 93 renemogo



Kohima, Monupii/May 16

(TYO): Department of Urban Development and Municipal Affairs, Government of Nagaland ajanga Pradhan Mantri Awas Yojana - Urban (PMAY-U) inyakba nung takok tajung anguba benjonga "Transforming Lives: A Glimpse at Pradhan Mantri Awas Yojana (Urban) Mission in Nagaland," nüngja agütsür coffee table book ka sayaogo.

Iba sentong ya Hotel Vivor, Kohima nung agi, kong nisung ajak nem talitsü ki (Housing for All) agütsüsü mangdang kübok state nunga iba alizüng tongtetsü küm toku agia liasü.

Iba sentong ya Advisor, Municipal Affairs and Urban Development, Zhaleo Rio-i moatsü aser paisa kakat ya sayatsü aser stakeholders temi lungjemer iba mission takok ngua inyakba asoshi tenüngsang agüja liasü.

Sentong nung jembidang, Nagaland nung dwelling units 29,973 sanction asüba nungi 27,806 renemogo aser ibaji completion rate shilem 93 alitsü, ta Zhaleo Rio-i ashi.

"Iba scheme takok ngua

inyakba nung Northeast nung Nagaland ya tajunglen lir aser iba atema tejak tenteter," ta pai ashi. Tanüngba units ya tang teyangludak mesüra technical timtem agi menudaktsüba lir, ta pai ashi.

PMAY-U ya 2015 nung tenzük aser 2025 tashi atsülanga arur aser ibai economically weaker sections (EWS), low-income groups (LIG), aser middle-income groups (MIG) nem jenjang talangba agi talitsü ki agütsüsü nükjidong nung Ministry of Housing and Urban Affairs ajanga tenzüka liasü.

Nagaland nunga iba scheme yagi statutory towns 32 awajemogo aser ano jila tenet tali inoksemtsü sentong yanglutar aser units talila 10,000 atema benoka lir.

Iba sentong nung sayaba coffee table book nungya iba scheme ajanga temelenshi bener arutsüba otsü shidakba, noksa aser terenlok nung alizüng atongba indang tejangja shia lir.

Iba scheme kübok subsidy sen 1.5 lakh dang nguaka tajangzük agirtemi bendanga

agütsür inyakba ajanga pei ki yanglutet mesüra tajungba kuma yanglushitet, ta ketdangsür temi ashir.

"Ibai sorkari yariba kisüng masü saka nüburtemia bendanga agütsür inyakba ajanga takok ya angu," ta ketdangsüri ashi.

State aser city level nung PMAY-U technical teams ajanga anibelem mesasai inyakba, tsüngtong oa semdangba aser documentation agiba asoshi alakteta tenüngsang agüja liasü.

Sentong nung Commissioner & Secretary, Municipal Affairs and UDD, Kekhrievor Kevichusa menden liasü, aser iba kakat yagi tejakleni aoba, timtem ajuruba aser temulung ajungmesoba otsütem tenük agi angutsü, ta ashi.

Sentong tenzüka Pastor, Peraciezie Baptist Church Kohima, Rev. Dr. Kevichalie Metha-i sarasadem, TRUISM ajanga temeja ken ka aten aser Joint Director & HoD Municipal Affairs Department, Temjenrenla Kichu-i melepzüng o jembia sentong tembanga liasü.

CMO Mokokchung ajanga metetdaksür

Dimapur, Monupii/May 16
(TYO): Mokokchung jila nung May 17, 2025 nungi June 16, 2025 tashi Special Blood Pressure & Blood Sugar Screening sentong ayongzüksü, ta Chief Medical Officer, Mokokchung ajanga

sangdong ka nung metetdaksü.

Anungji nübura ajunga teka amalitepa anasatiba mozü kidangi oa angati blood pressure aser blood sugar tendangtsü ayongzüker, ta sangdong ajangasa ashi.

Dimapur DPDB senden amentsü anogo melenshir

Dimapur, Monupii/May 16
(TYO): Ita shia amenba Dimapur District Planning & Development Board (DPDB) senden ya May 26, 2025 anüngdang 11:00 ako nungi tenzüka Deputy Commissioner, Dimapur

indang Conference Hall nung amentsü, ta sangdong ka ajanga ashi.

Anungji züngsem ajungai anogo melenshiba ama iba anogo senden nung arua adentsü ayongzüker, ta sangdong ajangasa ashi.

Niuland nung aid appliances angati lema agütsü

Dimapur, Monupii/May 16
(TYO): Accessibility to Disabled Persons (ADIP) aser Rashtriya Vayoshree Yojana (RVY) schemes kübok angati teyari oset lema agütsüba sentong ka Artificial Limbs Manufacturing Corporation of

India (ALIMCO) ajanga Deputy Commissioner, Niuland indang Conference Hall nung May 14, 2025 nü ayongzüka liasü.

Iba mapang nisung 40 nem wheelchairs, walking sticks aser hearing aid amala agüja liasü.

Excise department-i Vihokhu village nem tenüngsang agütsür

Dimapur, Monupii/May 16
(TYO): Vihokhu Village ketdangsür temi May 14, 2025 nü Indian Made Foreign Liquor (IMFL) balala cases 266 pua Department nem agütsüba atema tenüngsang agütsür aser pelaba lemsateper, ta Office of the Superintendent of Excise & Prohibition, Dimapur sangdong ka ajanga ashi.

aliba tanüla tajung lidaktsüba kisüng masü saka district nung dang yimtsüngtem asoshi tatishitsü tajung ka lir.

Department ajanga Dimapur, Chümoukedima aser Niuland district tem nung aliba Village/Colony/Authorities tem dang iba tatishitsü sülen anidaka temesepba yi ayongba aser alemba aziokba nung yariteptsü ayongzüker. Iba ama ozüng alema mapa inyaksangshiba lira, anasatiba Excise office nem tekeraba nung osang agütsüsüla, ta sangdong ajanga ashi.

Mera tajung aser teyakyak mapa inyakba ajanga Village Council-i Nagaland Liquor Total Prohibition (NLTP) Act, 1989 mapa kuma inyaktsü aser Rule of Law shidak amshitsü temulungtetba tejangja sayur. Village Council ajanga tasü tai mapa nunnganga melie inyakba ajanga nüburttem aser department tsüngta amalitep

Temesepba yi nungi jenbua society tajung yangerba nung nüburttemi maneni amalitep akatsü imlaa atar, ta Excise Department sangdong ajangasa ashi.

NSBSG ajanga Tseminyu aser Kohima district semdang

Dimapur, Monupii/May 16
(TYO): Nagaland State Bharat Scouts and Guides (NSBSG) pur phase pezü buba tour nung Tseminyu district aser Kohima district May 15, 2025 nü sema jaja liasü.

Tseminyu District Bharat Scouts and Guides indang district tir mezüngbuba ama induct asü aser B. Henok Buchem, NCS ya Kohima District Bharat Scouts and Guides indang district tir ama mapa nung anioka liasü.

NSBSG State Secretary Er. Thepfuzakie Angami-i anir züngsem tenet aliba tour team yagi district anaprong nung Deputy Commissioner ajurua parnok dang state nung Scouting/Guides indang worldwide brotherhood aser sisterhood movement indang angatetdakja liasü.


Deputy Commissioner anaprongi pei district nung Scouting/Guiding movement asoshi yaritsü tan ashi. Tseminyu ya district tasen ka asüngnung yangji Scout/Guides unit asoshi nübura anitena tenzüksü tasak asütsü aser Kohima ya capital district asüngnung tang aliba unit tem tali tashi itshitsü nüngdaker.

DEOs, SDEOs, Head of institutions, District Officials aser Unit Leaders tem lia Deputy Commissioner anaprong induction sentong agia liasü.

Iba tour ya takok ngua tembangogo aser district anaprong nungi DC ajanga lenmang balala nung yaritepba den tajungshi o shia liasü.

Rohit Singh, IAS ya

DES Nagaland ajanga Survey Report sayaogo



Kohima, Monupii/May 16

(TYO): Nagaland Economics and Statistics Service Association pur lokti senden ka May 16, 2025 nü DES, Conference Hall nung alidang Neidilhou Kreditsu, Director, Economics and Statistics, Nagaland ajanga Survey Report on Local/Block Level Statistics for Local Level Planning 2024 sayatsüogo.

Iba survey report nungya inclusive system of planning atema yimda yimtsüng nung basic amenities aliba osang tejangja agüja lir. Iba statistical

data ya ajanga state sorkari nüburttem asoshi sentongtem tajungba nung yanglutetsü. Iba yagi yimtsüngtem nunga parnok terenlok jenjang angateta terenlok asoshi meranga inyaktsü.

Iba survey ya March 31, 2024 tashinung yimtsüng 1285 nung agia liasü, koba Rural Development Department-i agizüka lir aser Electricity, Road Connectivity, Public Transport, Phone Service, Educational Institutes, Medical Facilities, Veterinary Health Centre, Village Council Hall,

Playground, Indoor Stadium, Marketing Shed, Anganwadi Centre, Fair Price Shop, Water Supply (PHED), Public Toilet, Bank, ATM Booth, Police Beat Post, Police Station, Common Service Centre (CSC), Self Help Group (SHG), Street Light, Internet Connectivity (Fiber to the home) amala parameters 41 awajema liasü.

Statistical system tashi itshitsü aser grass root level nung iba data indang awareness agütsüsü mechi state nung recognised village ajunga nem iba survey report ya agütsüsü.



New Delhi, May 16, 2025: Turkey-i Pakistan pusemba anema Hokolbarnü New Delhi nung Swadeshi Jagaran Manch züngsemtemi longkak aitba noksa nung angur.

EC-i Bihar election atema terenemshiba jenjang asadanger

Patna, May 16 (Agencies): Taküm küm tatembanglen Bihar nung Assembly elections agitsü lia May 15 nungi tenzüka Election Commissioner Dr Vivek Joshi-i anogo pezünü Bihar semdanger; pai Bihar nung election atema terenemshiba jenjang asadangtsü.

Hokolbarnü Bihar yimtiba, Patna nung Dr Joshi leniba nung tongti ketdangsertem senden ka mena liasü. Iba senden nungji Bihar nung Chief Electoral Officer (CEO) Vinod Singh Gunjyal, State Police Nodal Officer Kundan Krishnan, Inspector General of Police (Patna), Patna nung District Magistrate den SSP,Election Department nung Additional Secretary aser tongti

ketdangsertem aika aden. Election atema terenemshiba jenjang asadangtsü, election tiptema agitetsü aser ketdangsertem amalitepa election ketdangsüa agitsü atema iba senden ayongzük.

Bihar CEO, Vinod Singh Gunjyal leniba nung election atema security, polling stations, EVMs First Level Checking (FLC) aser polling ketdangsertem atema training program agidar.

Election Commissioner Dr Vivek-isa district kar semdangtsü.

Dr Joshi-i Motihari (East Champaran) aser Bettiah (West Champaran) na semdanga EVM FLC inyakyim reprangshitsü aser District

Magistrates, Superintendents of Police, Electoral Registration Officers (EROs) aser Booth Level Officers (BLOs) den shisa lemsateptsü. Paisa polling stations aser voter service centres kar semdangtsü.

Election Commission den India International Institute of Democracy & Election Management-i Bihar tesem ajaklen division sasep nung training agütsüdar.

Tang district 13 nung EVMs FLC tagidak lir.

Taruba Bihar assembly election tiptema tajungtiba nung agitetsü, aser ochimashi inyakyim kecha malitsü nükjidong nung Election Commission of India-i EC Joshi jelia Bihar-i yok.

Pahalgam amakba sülen sepai-temi kiralongrar 6 khasetogo

New Delhi, Monupii/May 16 (Agencies): Hokolbarnü Victor Force headquarters nung Indian Army, Jammu & Kashmir Police aser Central Reserve Police Force (CRPF)-i longjemer osangbenertem senden ka ayongzüka South Kashmir nung sepaitemi kiralongrartem mita aoba osang tejangja metetdaksü.

Kiralongrartem mita aoba mapang nung sepaitemi kiralongrar trok khasetogo, aser iba ya Kashmir Valley nung sepaitem atema takok tuluka lir, ta parnoki metetdaksü.

Victor Force nungi General Officer Commanding (GoC), Major General Dhananjay Joshi den Inspector General of Police (IGP) Kashmir V.K. Bhirdi aser IGP Operations CRPF, Mitesh Kumar nungeri tesüiba ghonda 48 tsüngda kiralongrartem mita aoba osang metetdaksü.

IGP Kashmir V.K. Bhirdi-i, "Teraksatsüba kecha makai kiralongrar trok khasetogo aser ibaji ajanga nüburtem kümzüksü atema kiralongra anema onoki melungteter raraba kuli angur. Sepai ajaki longjemer kiralongrartem aser parnok pusemba networks anema

rarar," ta ashi. Maj Gen Joshi-i Kashmir tesem aika nung rürjep yimsaa aoba ajanga sepaitemi timtem ajangshiba aser kiralongrartemi arem nung jenoktetba metetdakja liasü.

Paisa, "Intelligence osang ajanga Keller, Shopian nung kiralongrartem aliba metetdaksüba sülen onoki parnok mita ao tenzük. Senzüsempongtsü atema tesem tamajung süaka onoki kiralongrartem mita oteta kiralongrar asem khaset," ta metetdaksü.

Tral nunga security sepaitemi nisung aliba tesem ka mita aoba mapang nung kiralongrartem ajurua khatepdang kiralongrar asem khaset, ta Maj Gen Joshi-isa metetdaksü.

IGP Operations CRPF Mitesh Kumar-i, "Security agencies tsüngda amalitepa inyakba ajanga item operations takok nguogo. Onoki maneni longjemer raraba ajanga iba region ya kiralongrar maliba tesem ka kümdaktsütsü, ta onoki Jammu & Kashmir nung aliba nüburtem dang nangzüker," ta metetdaksü.

Chhattisgarh nung tang mezüng yim 17 nung light mesangoktsüogo

Raipur, May 16 (Agencies): Chhattisgarh nung Maoists telungpurtemi timtem agütsüba Mohla-Manpur-Ambagarh Chowki district kübok kanga tezülen aliba yim 17 nung tang mezüng electric light mesangoktsüogo, ta Hokolbarnü ketdangsertemi metetdaksü.

Yim 17 nungji tang mezüng light mesangoktsüba ajanga kibong 540 shi tajangzük angutsü. Mukhyamantri Majratola Vidyutikaran Yojana kübok sen crore 3 indoka item yimtsüngtem nung tang mezüng light mesangoktsü.

Kanga tezülen aliba tesemtem nungji senzüsempongsü asakba den külemi Maoists telungpurtemi timtem agütsüba ajanga terenlok mapatem ajanga item yim ayimjemtsü kanga tasak

liasü. Item yimtsüngtem nung electricity supply agütsütetbaji wadang tuluka takok anguba den kasa lir, ta ketdangser kati metetdaksü.

Item yimtsüngtem nungji light bulb tsükloksü atema solar power bo liasü, ajisüaka solar power anepalutsü kanga tasak liasü. Yim aika nung solar panels auyar oadoker, ibayongji school tanurtem kerosene milen tsüka dang lesson bushia liasü.

Tang mezüng light mesangoktsüba yim 17 ji Katuljhora, Kattapar, Bodra, Bukmarka, Sambalpur, Gattegahan, Pugda, Amakodo, Petemeta, Tatekasa, Kundalkal, Raimanhora, Nainguda, Metatodke, Kohkatola, Edasmeta aser Kunjakanhar lir. (Maneni tapak 8 nung...)



May 16, 2025 nü Jammu nung aliba school ka nung kaketshirtemi India nunger sepaitem nem tenüngsang agüja linük wako ayipshishidang tangokba noksa nung angur.

PM Modi-i party ajak senden ayongtsü memelunger: Congress

New Delhi, May 16 (Agencies): Hokolbarnü Congress party-i, linük security dak sendakba nung Ato kilonseri party ajak senden amentsü memelunger, ta aitsü.

Kiralongrartemi Pahalgam amakba aser Operation Sindoor dak sendakba nung party ajak senden ayongzüksü atema Ato kilonseri memelunger, ajisüaka kiralongra dak sendakba nung bendanger sorkartem den jembitsü atemabo party balala nungi lenirtem bendangleni yoker, ta Congress-i metetdaksü.

Congress lenir Jairam

Ramesh-i X ajanga, "Ato kilonseri kiralongrartemi Pahalgam amakba aser Operation Sindoor dak sendakba nung party ajak senden ana ayongzüksü memelunger. Congress-i Parliament nung temeja senden ka ayongzüka ajak longjema aliba sayutsü aser 1994 küm February 22 nü renemba bangzüng lephsia agizüksü atema akhanger, ajisüaka Ato kilonseri memelunger," ta metetdaksü.

Anogo ishika tejaklen Congress Tir Mallikarjun Kharge-i Ato kilonser dang India aser Pakistan na tsüngda

ceasefire telemtetba agiba kuli metetdaksütsü atema party ajak senden ka ayongzükan, ta mepishia liasü.

Ato kilonseri May 25 nü NDA teloktep nungi Chief Minister tem senden ka ayongzüka sülen ibaji aija Congress-i, opposition-i yimsüsüba state tem nungi chief minister tembo züngdokba ajanga Ato kilonseri linük security ya yimtenren onük ka kümdaktsür, ta aitsü.

Ramesh-isa, "Ato kilonseri par party nungi chief minitser tem dang masü saka chief minister ajak jaoktsüla," ta ashi.

AXIS Bank Ltd
A.C.Market, 4th Floor,1, Shakespeare Sarani, Kolkata- 700071

Public Notice for – E-Auction of pledged assets being Gold

Talisa sen apurtem aser public dang, Axis Bank-i tsünglanglen shia aliba Branch nung gold ornaments pledge süa aliba public auction asütsü ta sangdonger. Tsünglanglen shia aliba sen apurtemi Bank nem security atema gold ornaments agüja ("Gold Loan Facility") Axis Bank Limited dang nungi credit facility agi. Sen apurtem/Guarantors dang Demand Notice ajanga Gold loan facility agiba atema sentsüh agüjang ta metetdakja liasü. Sen apurtem/Guarantors-i loan sentsühji magütsütet, anungji bank-i pledged gold ornaments ji 27-5-2025 anogo nung nikongdang **12.30 ako nungi nikongdang 3.30** ako tashi nung (e-auction mapang) "Kong aliar yamaji", "Kechisa aliar yamaji", "Koma lidir yamaji" aser "No Recourse Basis" nung e-auction asütsü ta sangdonger.

Details of Borrowers and outstanding amount.

Branch Name	Customer Name	Loan A/c No.	Amount Outstanding	Date of Demand Notice	Gross Weight Grams	Net Weight Grams
LHOMITHI BAZAR NL	MUJIBUR RAJA KHAN	XXXXXXXXXX9984	307900	30-Jan-25	65.400	62.800
PURANA BAZAR,DIMAPUR [NL]	RITSA L THONGRU	XXXXXXXXXX1921	155279	24-Mar-25	37.900	37.200
DIMAPUR [NL]	HOKY IHOTO SHOHE	XXXXXXXXXX2504	149761	24-Mar-25	32.700	32.500
DIMAPUR [NL]	GULJAR HUSSAIN	XXXXXXXXXX1209	144109	30-Jan-25	35.700	34.000
LHOMITHI BAZAR NL	FARIDA BEGUM	XXXXXXXXXX6051	128393	30-Jan-25	33.800	32.800
DIMAPUR [NL]	SHETONI YEPTHO	XXXXXXXXXX4174	1301016	7-Sep-24	367.100	310.200
DIMAPUR [NL]	BISWAJIT KAR	XXXXXXXXXX3835	352351	28-Aug-24	113.500	95.500
LHOMITHI BAZAR NL	LONGCHENTI LONGCHAR	XXXXXXXXXX2992	236892	24-Mar-25	45.400	45.000

Jelia osang memetetdaksü account agientsü/auction anogo melenshitsü atema Axis Bank Ltd. dak tashi lir. Auction ji online <https://gold.samil.in> (website of online vendor) ajanga nikongdang **12.30 nungi nikongdang 3.30** ako tashi nung agitsü (mapang). Telatetbatem aser osang tejangja atema website <https://gold.samil.in> (website of online vendor) nung reprangtsü akok.

Date: 17.05.2025 Place: Kolkata**Authorized Officer, Axis Bank LTD**



TIR YIMYIM YIMOBILEM (EDITORIAL)

DIMAPUR

KÜPTOKNÜ

MONUPII 17, 2025

Aluyimtsü ajungshir

India nung aluyimnür nisung crore aika lir saka ali maka, anungji nisung aika tangar lu mepua ayimer aser ano aika tangar lu nung ayanger aser tanüngba nisungtemji mapa maka nemzür. Iba jagi India lima ya government-i rongsenkettsüng osang agütsüba nung takar amai agütsüaka, India akabaji India nung kibong ajak aka masü saka ali akar kibong kar kanga takar aser tanüngba nübortem noklang shilem nung teimbaka anogo nung chi tebok sünga anaben mechiyongtet ayaba agi timtemba purtem lir. Itemji asenok tia aser jenjang den medemdangra, asenokbo ajak takar ta shitettsüsa Tsüngremi moaja lir, kechiyong asenok ajak ya ali kiburtem lir. Aji oda, alima nung mapa ajak ya ali nung amendaker tenzüker asünungji ali kara, asenok takar-a ta bilemdi. Ibayongji, tangaribo asenok Naga nungertem ajak ya takar ta bilemer. Ashiko, ibayongji tsümartemi balaka asenok ajak dang 'sahib' aser 'mimsahib'ta ajar südi. Atangji, ibajia aküm tuluka, ajisüaka tenüngji dang ashi asenok senpong aser jangpongbo tazüng yur timatemer. Aji oda, ali akayonga ali achitsü masü saka ali nung jagi asenoki züsentetbatem dang achitsü aser item jagi dang tagitsü kuma yanglutsü. Ibayongji, asenok ali nungbo takar saka achiajemtsüa maka timatemer. Ibaji tangaribo mamangtsü. Joko, asenoka iba ama tia nung asen nem agütsüba temoatsü mereprangtet timtema melii, Tsüngremi moatsü li nung aluyima shitakba takar kuma alitsü asoshi temulung meyiptsü mapang tongogo. Atangji, kodang alu ayimtsüba indang jembidir, metenzükdangyongi aniadoker aser moapu nung tzünglu ajaa aser anü pua temang ajak raksaa alu watang nung nokdaka angur. Ibaji asenok tsürabur mapang aluyimba indang asen kolok aser mulungjang nung tangoka ayuba noksa tejentem lir. Aji oda, akhidang asenok ano shisa tenük melapokdang, tsüraburtem sürashi apunger alulem aser mertsüng agi tekong lu ayimba agi tebok mesüngtet timtemba sensaker otsü aika lir. Iba jagi, asenoka government mapa nung ita sen angu tenzüka ta aodang, anogo shia alui aoer saka tebok masünger ta timatemsü agibo, aluang mayim tsümar jang alia chiyongba tajungba aser dalangba ta angtet nung ka khen, ka khen ta meilongi aluyimertemi alu mayim aküm aser talisa Naga nungertem rongnungsa süaka asenok Aortem rongnungbo tsük lu ayimer aluyimerbo kenyongi mali ama kümogo. Ibaji asenok asoshi shisabolutsüka lir. Aji oda, ali tuluka akatsüa akok, ki tajung nung lia alitsüa akok aser gari tajung nung senzüa alitsüa akok, saka kechikomaka ser tangalen nungi asen limai jangotsü meyoktetsüsa aküm nungbo, tangar Naga nungertembo pei tzülu nung aroba tsük agi küm ka anabo otettsü saka asenokbo hopta kata moutettsü. Iba ama tensa tia tamajung arudanga koktetsüsa, asenoka tangar Naga nung amaji pei peribosa pei lu nungi züsentettsüsa alu ayim tenzüksüla. Tanü asüngbo alemli ama temang ajak raksaa alu ayimtsüba masü saka alu ayimba agiang temanga anema alitsüsa mapa inyakyim aser mapang meteta inyaker. Aji oda, aluyimba nung amshitsü asoshi Naga nung aluyimertem nem yakanü Union Agriculture aser Rural Development minister, Shivraj Chouhani Nagaland nem sen crore 338 agütsütsü nangzükba asenoki angashiogo. Iba ama senji amshia tanü putu dak apet alu ayimtsü atema KVK nungi aluyimba nung mongintem aser University nung aluyimba indang sayurtem dena District Level Scientific Team ka kümer, item jagi ita nung anabenbo yimtsüng shia sema oa aluyimertem ajurua pei li dak apet technology amshia alu ayimtsü sentong yanglua mapa tenzüksü asoshi metetdaksüba jagi, Nagaland nung aluyimba nung asentenshi tulu adoktsü imlar. Iba ama center nungi len tajung sayua senotsü teyari dena agütsü dang, asenoka joko tejen shisatsü endoker, pei lima aser nübortem chiyongtsü asoshiibo tangar dak nendaka melii litettsüsa, lenirtemi anir, mapang tajung ka tenzüktettsüla.

OLEMSABANG

Ao Rijui Achaayanga agiba “Kaket Zülur Shisamolu”

Rongchii 26, 2025

Onük: Ao Oshi Tamentakdak aser Lirumedem.

~ Tejembir : Mr. I. Temjen Tzüdir

(Yashi adok nungi...)

Asenoki asen Ao oshi tamentakdak tongtimbang kar reprangdangra, oshi ka tamentakdak sayutsü asoshi inyakyim kar ajanga temelaba angatettsü anungji yangi ni tongtimbang ta bilemba kar tatsütsü agi rasatsü merangdi.

- Yim akümdang kechi oshi jembiri anir yimji aküm?: Yimtsüng ka asoshiibo ibai kanga tongtimbang saka reprangdanga ora oshi yabo tamentakdak ka lir aser ibaji nübur shirnoki oshi kaji meima nentaka jembir aser bushir iba dakji dang tuluka amentaka lir. Tat. agi Mongseneri anir yimji kümaka, iba yimtsüng nungji mongsen o mejembiba yim-a lir. Ano Jungliri anir yim kaji kümaka iba yim nungji jungli oshibo mejembiba yim-a lir. Anungji asen oshi tamentakdakji otsübaji masü saka oshi kaji lisopuri pei oshiji koda ketasena nentaka jembir aser amshir iba dakji tuluka keta lir.
- Sobusolemtsü (attire): Asen oshioben ya asen sobusolemtsü nunga amentaka lir. Sobusolemtsü ajanga kin ka shisanger, tetsür tebur bendangteter, tensa mapang bendangtsüteter mesüra metetdaksür. Ano kaketriju nung balaka sobusolemtsü sentsü kasa (uniform) sobuba ajanga tulu tila, takar sensaker aser nisung tsüngda mebendangi ka ama kümdaksür. Tanü putui-a iba sobusolemtsü ya amshir, saka talisa akhi asen tütsüteboutem sobusolemtsü ajanga asen oshioben tamentakdak sayuba kulitem angutsü. Sobusolemtsü nungji nüngja balala aser item shia tetezü aser meraket balala sayur, yamaji item nüngja nungji asen oshioben amentaker aru. Akhi asen tütsütebou sobusolemtsü ajanga asen sobaliru aser oshioben jangjadaksü.
- Saisabong nung amentakbaren: Asen lisopur (Aor) saisabong ajak agi 80 shi lir, tat. agi teburi dang asayaba tenemsürana (52), tetsüri dang asayaba asem (3), tetsür tebur meyoktepa asayaba ter (10), tilatanurtemi asayaba terpungu (15) shi, yamaji item saisabong tapu balala asayadang jembiba, ola adokba aser nüngjakoja nung asen oshi amentaka lir.
- Arju aser Tsüki nung amentakba: Asenok ajaki angazüka aser jembia aruba ama akhi asen tütsütebou mapang nungi tebur asoshi “Arju” aser tetsür asoshi “Tsüki” ta item nung lanurtem sobaliba aser libalirutsü ajak angazüka aru, tetezü yangji asen oshioben ajak aremoka liasü.
- Tzüyokmenyok nung asen oshioben amentaka lir: Kodang yim ka nung yimkong tzüyoki odir, yangji sobaliba, yimsüyimpong, nüngjakoja aser awashiren aika sentaka lir. Yimkong tzüyokmenyok nung mapalem tabensa, telatet, yimli awashi, jungshitepren aser tambu tanubo awashiren item ajak keta lir.
- Kikasüchi nung amentaka liasü: Iba kibasüchi maparen ya pei taküm kibong sobatiaba/tsür den tesentaktep junga aliba tamaittsü dang masü saka pei sasa meranga züsentetba rongsen nungi angati nübur dang jungnüba aser awashitepa lemsatepba dena lir, koba nung asen sobaliba aser oshioben jangjaren jenti den sentaktepa angutsü.
- Ao Oshi ya süngkong aser ken nung amentakba angutsü: Asen oshi ya zülu wadangi maidangyongi süngkong atemba mesüra ken atenba liasü. Süngkong ola balala atemba ajanga nüburtemi tepela, tejashi aser lendong osang agütsüba angatet. Iba den ken ajanga nisung ana ajurutepa o mejembitepaka ken ajanga sensaksem/jembitepba küptoka nüngdak peritepba otsü aika lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

May 27-30 anogotem nung European Conference on Evangelism agitsü



May 16, 2025: Yisu Khristai Pa nütsüngtem dang 'alima kintem dangi oa osangtajung proktsü' tenyaba wadang nunglochtsüba osang tanü-a kasa dang lir.

Nüngtugu sayutsüngir, asür Billy Graham-i Kibubai tenyaba wadang kanga nendaka inyakogo aser tang par jabaso Franklin Graham-ia maneni kasa wadang inyaker.

May 27 nungi May 30 tashi Billy Graham Evangelistic Association (BGEA)-i Germany yimtiba, Berlin nung evangelistic sentong tuluka ayongzüka agitsü.

2000 küm Amsterdam nung BGEA-i evangelistic sentong tuluka ayongzüka agia liasü. Iba sentong nungji alima tesem balala nungi sayutsüngirtem aser pastor tem aika aden. Iba sentong nungji adener Tsüngrem tenzükertemji India, Nigeria, Kazakhstan, United States aser Singapore densema linük aika nungi liasü.

1966 küm Berlin yimti nung Rev. Billy Graham-i mezüngbuba World Congress on Evangelism sentong ayongzüka agiba sülen küm aika lir 2025 küm BGEA-i maneni Berlin yimti nungsa evangelistic sentong ya ayongzüka agitsü.

1966 küm ayongzüka sentong nung jembidang Billy Graham-i, "Berlin yimti ajanga lenla aika nung alima kongshiogo. Khrista ya

Kümtetdakba, ta sangdongtsü atema iba tesem ya kanga tajung," ta metetdakja liasü.

May 27-30 anogotem nung ayongzüka agiba sentong nung Europe nung aliba Khristan lenirtem dak ranglochtsü aser Khrista osangtajung prokba nung parnok nungita yaritsü, kechiyong iba continent ya tesangwa samaba continent ka kümdar.

European Conference on Evangelism sentong nungji linük 55 nungi pastor tem aser ministry lenir 1,000 dak tali adentsü.

BGEA Tir aser CEO, Franklin Graham-i, European Congress on Evangelism omenji Rom 1:16 asütsü. Rom 1:16 nung yamai zülua lir, "Kechiyong Khrista osangtajung atema ni maaker; kechiyong tamanger ajak, oda tamasa Yihuda nunger, aser Grik nungera kümzüchtsü, osangtajungji Tsüngrem ain lir."

Tesüiba küm ishika Franklin Graham-i Europe nung kanga rangloker inyaker, kechiyong iba region nung Khristan yimsü jenjang tamajungba akümer.

Berlin nung ayongzüka sentong nungji tejaokertem dang adentsü aser linük 13 nungi o jembirtem parnok 20 dang alitsü.

Osangbener den jembidang Franklin Graham-i, "Asenoki osangtajung sayutsüngitsüla.

Asenoki iba atemaji maaktsüla. Asenoki Pa asüba, leper nung aremba aser shia aruba indang sayutsüngitsüla, aser Tsüngremi ibaji moatsütsü," ta ashi.

Paisa, yaküm Germany nung Tenla ki 1,000 kishi shibangadokogo, anungji iba sentong agitsü atema Berlin yimti ya kanga tongtimbang aser Arogo maneni taküm alitsü atema ajungshitsüji kanga tongtimbang, ta metetdaktsü.

"Onoki Europe nung mi jangrudaktsüner. Arogotemi tasü aittsüla aser Khrista osangtajung proktsü atema maaktsüla. Ukrainian Arogotem arutsü aser Russia nung aliba Arogotem-a arutsü. Item linüktem ya tang tongbang nung lir, ajisüaka Khrista osangtajungji ajak dang nungi tashi tuluba," ta pai metetdaktsü.

Interview ka nung jembidang Franklin Graham-i, "Ni arrshi küm 73 lir, aser ni animesüngzüchtsü. Ni marakzüi malitsü. Kü dak tashi ali tashi aser temang anema ali tashi ni inyaktsü. Tsüngremi melungba dang süra ozü jabasotemi aser semchirtemi kü tsüngsü nung anidaka inyaktsü, ta ni amanger. Ajisüaka Kibuba Yisu Khrista yakta tanaben arutsü ta ni amanger. Tanü alima nung tatalokbatem aser temaitsütem ya reprangdangra Kibuba Yisu Khrista yakta tanaben arutsü ta ni amanger," ta metetdaktsü.

Chhattisgarh nung Khristan 45 dak züka yimdak nungi meindok

May 16, 2025: Chhattisgarh state nung Sukma district kübok Durandarbha yimdak Khristan aika dak züka yimdak nungi meindokogo.

April 24 nü tribal yimsü amangertemi Khristan kibong 11 jaoka liasü. Iba sülen nisung 60-i Khristantemji longbanger parnok dang Khristan yimsü tokjang ta tuyu.

Ajisüaka Khristantemi Khristan yimsü toktsütsü memelungba sülen yimdaklirtemi tanur-tain kecha mebandangi Khristantem dak azük.

Khristan, Hirma Markam-i, "Parnoki Khristantem dang taochi mesayu. Yimdaklirtemi Khristantem dak kanga mejungi azükba ajanga aika

yiruogo," ta metetdaktsü.

Khristan 45 ji anasa aliba arem aser tenemleni jena aoba sülen aonung arem nung yipzük. Tasüngnü kilometer 17 shi pilar aliba Chintalnar yim tonga aoba sülen parnok Tenla kidang jenok. Yimdak nungi jena aoba mapang nung kibong karbo züngsemtem pilaa liasü, ajisüaka tanga yim ka nung parnok tanaben longjemba sülen Tenla ki bushia ao.

Anogo ishika lir sülen yimdaklirtemi Khristan, Mediyam Lakhma'er kibo rongdoktsü aser tanüngba Khristantem ki mita oa Aadhaar cards, ration cards aser bank records densema tongtimbang document ajak rongdoktsü.

Khristan kati, "Iba ya yimdak Khristantem meshimeshia samatsütsü nükjidong nung inyakba lir. Onok meyong documents dang masü saka Laishiba-a rongdoktsü," ta metetdaktsü.

April 28 nü Khristan tetsür anabo tensa ladangtsü atema yimdaki meyipa ao, ajisüaka yimdaklirtemi maneni amokmerena tena dang, "Yisu sülen maneni anidaka nenok kar danga yimdaki arura tepsettsü," ta metetdaktsü.

Yimdak nungjagi Khristan kibong kabo jena moutetba sülen yimdaklirtemi tebu den par jabaso ka na dak azük, aser kidang nungi ayazüka moudaktsür.

(Maneni tapak 8 nung...)

ANOGO ABEN TSÜNGREM DEN

Taidok angutsü taidok agüjang - Mathi 6:12

Agütsüba dang nungi agizüktsü senti rongsen ishika lir. Asenoki temenen khuret bener külen, shiba nem asenoki tai agütsü Pai tesüngmangtsü ka tai taidok agütsü aser nüji kümdaktsü. Tsüngrem dang sarasademba shia taidok meshitsü Yisui nütsüngtem dang sayu. Asenoki anogo shia Tsüngrem anema inyaker ta Yisui metetta liasü. Tsüngrem dang taidok memeshi asenoki anogo kata süidaktsütsü makok. Asenoki tangar dang tai adokba ama Tsüngremi asenok dang tai adoktsü ta imlaang ta Yisui sayu (Matt. 6:15). Taidok agütsübaji Tsüngrem yimya (Anitet 34: 6-7). Asenok Pa nütsüng asütsü, Pa tsüngsü nung jajatsüla. Asenoki taochi makaba asen tsükchir dang tai medokttetra, asenoki kecha meinyaktet. Aibelen karbo asenoki tai madoktsüla ta Yisui mesayu. Asen mulungjang nung taidok magütsü ayutsübaji Lai tesayuba masü.

Nai kar nem taidok magütsü soita yura, ne tekülemji aser sarasademji amajok (Matt. 5: 23-24). Pauli Tesalonika nung aliba Khristantem dangi tasü aittsü ajungshia zulu (1 Tesa. 3:7). Parnoki koda meimtsü rasaa ashitsü asoshi parnoki Paul menüngdak, kechiaser parnoki kati ka dang koda meimtsü Tsüngremi Pa temeim parnok dang sayu. Tsüngremi Pa temeim parnok nem agütsü, aser parnoki pa sülen anidak dang Pai Pa temeim rendaktsütsü parnoki Tsüngrem meimtsü asakba kar ajurura, Tsüngremi Tanela Temeshi ajanga pa meimtsü parnok mulungjang nung ajungshitsü.

Tsüngremi Pa taochi nung asenok meimchir tashimait nung yaritsü teyari leman renemtsü aser asenok rongnung kati ka dang meimtsü sayutsü Pai renema lir. Idakji kecha tependang mali. Tsüngremi ajak dang meimtsü asenok dang sayur.

Tangar meimtsü na timtema lir asü ? Tsüngremi na yaritsü. Nai ne temeim tetezü aketba lenman nung sayutsü memeteti lira, Tsüngremi ibaji sayutsü. Temeim nung Tsüngrem tashi lir. Na tangar den sendaktep dang ne taküm ajanga parnok dak temeim adokdaktsütsü Tsüngrem dang asüngdangang. Ne mulungjang nung tamang kinükji sayutsü Tsüngrem dang asüngdangang. Nai taidok agütsütsü nüngdak angatetba jagi tangar aibelenertema tim leman nung angatetdaktsütsü. Khrista mesüka na alitsü Tsüngrem dang asüngdangang, idangji nai "Oba, parnok dang tai dokang" ta sarasademtettsü.



Ao Baptist Arogo Mungdang (ABAM)
IMPUR-798 615, MOKOKCHUNG, NAGALAND: INDIA
E-mail : abamimpur7@yahoo.co.in
Website: www.abamimpur.org

METETDAKTSÜR

Aor kaket ken-o-zulu balala; Arogo aser Lokti anaprongla asoshi zülubatam nungi küm shia tajungtiba shimteta 'ABAM Book of The Year Award' agütsür.

Kaket ken-o zülurtemi 2025 küm asoshi teküboklen agüja alibatam nungi leniba agia meranga züluba nung shilem agitsü ajungshir.

- I. Kaket shimyim yamai alitsü :**
 - Kaket tezülur shisatsü nungi atokba (Original) asütsüla.
 - Kaket zulu nung asalentong tasen (Creativity) aketba.
 - Kaket züluyim shitak (Methodology) amshitetba.
 - Tapu aser pongtem züluba nungi tarensen (consistency) shitak amshitetba.
 - Tazüngertem tajangzük katetsüsa (Utility) züluba.
 - Tapak 100 tema züluba kaket asütsüla.
- II. Kaket züluba Oshi :** Ao aser English nung züluba nungi ka-ka shimtsü.
- III. Tezülur shimba nung adenba :** Iba Award shimba nung shibaisa adentsü mulungdir, pei züluba kaketji copy asem (3) kaket adokli tekaraba nung Rongjui (Sept) 30, 2025 tashi Mungdang nem agütsütsü. Iba kaket ABAM meyong asütsü. Panel of Judge-i kechi kaket shimdir, Senpetji ABAM Küm Tatem Mungdang, Yimpoksüi (Nov.) 13-14, 2025 nung agütsütsü.

Sd/-
(Rev. Tamsü Jamir)
Executive Secretary, ABAM

Sd/-
(Rev. Dr. Moanungsang)
Secretary
Education & Literature, ABAM

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Temtsüing

(adv) tsüinglanglen, teküpboklen (lower side)

* Alu inyak dang temtsüing len nungi tenzüker.

Temulungjang

(n) temang nung azü aser shisatsü arakzüdaktsüba shilem (heart)

* Tanü asüing temulungjang tashidak aketertem aika kümogo.

OLONG PAITEP # 7153

	1	2						3	
4									
5								6	
7								8	
9	10				11			12	13
14				15					
	16								

TIPIEN

1. Ajem-ajemer - 9
5. Kanga tapet - 7
6. Ozü ka tenüing - 3
7. Tzüinglu nungi kümzüker - 6
8. Anüing nungi tsüker - 3
9. Anüing shiruru - 3
11. Lenmang ajurutepdak - 6
14. Anüingdang tesangwa - 3
15. Tekong merang - 7
16. Teyazü jembia tangar ashiochtsür - 9

LANGTSÜNGLEN

2. An-i akor - 5
3. Tashi aketba chiyungtsü - 5
4. Kecha menungnangi - 4
10. Küm asem tarensen - 5
12. Nisung yimyatsüya - 5
13. Mali / mait - 4

OLONG PAITEP # 7152 TELANGZÜBA**TIPIEN :**

1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem,
15. Tambu, 16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok,
12. Amang, 14. Jala.

NAI-A YA METETTER MA

United States nung Purdue University kübok Elmore Family School of Electrical and Computer Engineering nungi kaketshir telok kati Guinness World Record ka yanglutetogo.

Parnoki Purdubik's Cube ta ser ka yanglu aser iba ajanga "Fastest robot to solve a puzzle cube" otsü yanglua liasü. Parnoki yanglutetba robot ajanga 0.103 seconds nung puzzle cube yanglutet. Purdue team nung Junpei Ota, Aden Hurd, Matthew Patrohay aser Alex Berta nunger dena lir.

Assam Rifles-i Chandel district nung prangpong 13 angu**Imphal, May 16, 2025**

(Agencies): Assam Rifles-i Manipur nung AK-47 rifles, RPG launcher, M4 rifle, aser single barrel breech-loading (SBBL) rifles dena prangpong 13 apu.

May 14, 2025 nü telungpur den khatepba sülen iba tesem nung prangpong-injang aika angu ta ketdangsürtemi ashi.

Manipur kübok Chandel

district nung New Samtal village nung mita aodang prangpong-injangtem angu aser telungpur 10 khaset.

Iba tesem ya Indo-Myanmar Border (IMB) anasa lir ta Defence wing sangdong ka nung ashi.

Iba tesem nung khasetertemji Myanmar nung amenoka aliba Kuki telungpurtem asütsü ama

bilemer ta ketdangsürisa ashi.

Parnoki arrtsü adena telungpur maparen inyak aser ketdangsürtemi parnok maitüsü jangjatsü atema bushitepdar.

IMB anasa surveillance akangshiogo aser security forces-i kanga junga anüker. Parnokisa civil administration aser intelligence agencies den yaritepa arrtsü anüker.

Facebook post ka atema kaketzülur Ismail Hossain apu**Guwahati, May 16, 2025**

(Agencies): Assam nung ashishitep aketba kaketzülur Ismail Hossain-i online nung tetsür ka anema tim masüba kar züluba atema police-i puogo.

Mangaldai Sadar Police Station-i Hokolbarnü Jorhat nung Hossain apu.

Hossain-i Facebook post ka nung la anema o tamajung zülü ta Manag dai Kendriya Vidyalaya nung tesayur kati ken o benokba nung ajemdaker pa apu.

Brihostibarnü Mangaldai

police station nung iba ken o benoka liasü.

Tesayuri züluba Facebook posts ka atema Hossain-i tashishitsü aketba onük zülü ta tai tongloktsü aser iba nung ajemdaker police-i Jorhat kübok Garh Ali area nungi pa apu.

Ismail Hussain ya Guwahati nungi lir aser pa ya tang Prince of Wales Institute of Engineering, Jorhat nung assistant professor ka ama inyaker.

Hussain-i ozüing alema inyakba ya tang mezüing masü.

Yaküm July ita nunga pai per ka tepsetba aser tangar danga iba amaji inyaktsü ajungmesoba atema tai tonglokja apu.

Iba tatalokba atema snake conservationist Pranjit Rajbongshi-i Barpeta district kübok Howly Police Station nung Hussain anema First Information Report (FIR) ka benoka liasü.

Hussain-i Jorhat nung engineering institute ka nung miim maliba per ka tepset aser ibaji social media nung prokshi ta FIR nung shia liasü.

MYC-i Abiel Marak asüba bushisüingdangtsü akhanger**Guwahati, May 16, 2025**

(Agencies): May 14, 2025 nü Regional Institute of Medical Sciences (RIMS), Imphal nung soseta aliba Abiel Salchiana Ch. Marak indang ken o kanga junga bushisüingdang asütsüla ta Meghalaya Pradesh Youth Congress (MPYC)-i takhangba agütsüigo.

Abiel Salchiana ya lar hostel takdang nung sür lia angu. La ya 4th-semester B.Sc nursing

student liasü aser Meghalaya kübok Garo Hills nungi liasü.

La asüba atema mangyimba aser ano lisopur aser minority communities nungi kaketshirtem kümzüka ayutsü atema MPYC-i Manipur Governor dangi shidi ka zülü.

Abiel asütsüsa tensa ajuruba ya kanga junga bushisüingdang asütsüla. Kari la dak tim masüba inyak asü, bendanga amshi mesüra rejui senzüka

yutsü kuli metettsüla ta MPYC-i shidi nung ashi.

Garo Students' Union (GSU)-i ochi aser temeten bushiba nung onoki pusema nungiter ta parnokisa shisem.

Manipur Governor-i Abiel asüba dak sendakba kuli metettsü atema "independent, impartial, and time-bound inquiry" asütsüla ta MPYC President, Timjim K. Momin-i ashi.

Küm 3 nung tang mezüngbuba Russia aser Ukraine yimjung ken o jembitsü

Istanbul, Monupii/May 16 (Agencies): Küm asem nung tang mezüngbuba Russia aser Ukraine tsüngta indang-indanga yimjung ken o Hokulbarnü jembitsü lir, shirnok Turkey tetsüngtai ia ayongtepba ama Istanbul nung adenshia lir, saka aikati küm asem dak tema raraba anentsü asoshi tangbo teimla kangabo mangur.

Defense Minister Rustem Umerov-i aniba Ukrainian delegation ya presidential aide Vladimir Medinsky tekolak sür low-level Russian team den ajuruteptsü lir.

Iba rara tatem kati arutsü asoshi tang tesüsa merangba Brehostibarnü kanga mejungi tenzük, kechiaser Ukraine Tir Volodymyr Zelenskyy-i tejak o tejak jitepa senden amentsü maongka agütsüba Russia Tir Vladimir Putin-i magizük.

Linük ana nungi delegations tem ya Turkey linük nung aliba yimti balala nung arua lir aser jembishinütsü asoshi khenyongi meputep ketdangsürtem yoka lir.

Putin aser Zelenskyy ajuruteptsü teimla kanga ajema lir aser yimjung asoshi inyakyim züklaaba ajanga tangatettep kati arutsü asoshi Turkey nung tasü tait mera agitsü teimla mangur.

Rara tembangtsü atema linük ana taginüba khenyongi balala lir, aser Brehostibarnü US Tir Donald Trump Middle East-i aodang iba mangatettep bentettsü asoshi Putin tena tsüngta senden ka amentsü kanga tongtipang lir ta shia liasü.

Hokulbarnü Trump-i Putin tena tekeraba nung senden ka amentsü akok ta shiogo.

"Yamaji inyaktsü mapang tongogo ta ni bilemer," ta Trump-i Abu Dhabi nung osangbener

dang ashi.

US aser Europe ajanga anogo 30 atema ceasefire alitsü proposal agütsüba Ukraine-i agizük, saka Putin-i khenyongi magizük aser tamakoktsü takhangba agüja liasü.

Kasa mapang Russian sepaitem military offensive tasen atema renemer ta Ukraine sorkar aser Western military analysts temi ashir.

Russia-i amakba nung Ukraine nunger civilian 12,000 dak tema tepsetogo aser jila aser yimtsüngtem kangasa mejungi raksatsüogo, ta UN-i ashir. Ukraine sepai meyirijang aika süogo aser Russian sepaitem ang timba sür alitsü ta ketdangsür aser analysts temi ashir.

Hokulbarnep Ukraine northeast tsütsü Kupiansk yimti nung drone amshia amakba nung arishi küm 55 tain tetsür ka tepset aser tebur pezü yiru, ta Kharkiv Regional Military Administration tekolakba Oleh Syniehubov-i ashi. Iba lendong ajurur ajunga ya municipality utility atema inyaktertem lir.

Brehostibarnü Turkey linük yimtiba nung pa den senden amentsü Zelenskyy-i ayongzükba Putin-i magizükba sülen Ukraine tiri Moscow-i rara tembangtsü süoki ia magizüki low-level negotiating te3am ka ang yok, koba "theatre prop" ka dang lir, ta aitsü.

Ajisüaka paibo Hokulbarnü Istanbul nung senden amentsü atema defense minister-i anir yoker, ta Zelenskyy-i shia liasü.

Russian delegation nungya senior officials asem dena lir, ta Kremlin-i ashir. Jembishinü atema Putin-i lower-level officials pezü "experts" ama

shima lir.

Hokulbarnep Ukraine ketdangsür temi United States, France, Germany aser United Kingdom nungi national security advisers tem den senden mena liasü ta osang ka ajanga ashir.

US ya Trump indang special envoy to Ukraine and Russia, retired Lt. Gen. Keith Kellogg-i anir lir, aser Ukraine tenüng nung Umerov aser presidential office chief Andriy Yermak lir.

Turkey, US aser Ukraine lenirtem tsüngta senden ka menogo. US ketdangsür rongnung Secretary of State Marco Rubio aser Kellogg dena lir, ta Turkish Foreign Ministry ketdangsüri ashi.

Kasa mapang küm asem tsüngta Ukraine den indang-indanga yimjung ken o jembitsü atema lower-rank delegation yokba ya Russia Tir Vladimir Putin asoshi aibelen tulu lir, ta NATO tekolakba Mark Rutte-i ashi.

"Yimjung maparen tenzüksü pa dak keta lir ta pai kanga junga meteta lir, pa timtem nung lir, pai low-level delegation yokba ajanga aibelen tulu ka inyakogo," ta Rutte-i Tirana nung osangbener dang ashi, kong European lenirtem senden ka amener.

"Teinyaktsü ajak Putin dak keta lir. Pai inyaktsüla aser yimjung atema pai temulung agüja inyaktsüla," ta Rutte-i ashi.

Albania nung European Political Community (EPC) senden Hokulbarnü amenba nungya Moscow tali ajungshitsü asoshi lenmang bushitsü, kong European Union züngsemtem aser danga linük 20 shi nungi adentsü aser Ukraine Tir Zelenskyy-a yangji adentsü ogo.

Israel-i Gaza north tsütsü amakdang nisung 100 jungnüa tepset

Cairo, Monupii/May 16 (Agencies): Hokulbarnep Israel-i alilen, anünglen aser tzüyimlen nungi Gaza north tsütsü amakdang tila-tanurtem densema nisung 100 jungnüa tepsetogo, ta Hamas meyong civil defence aser yangji alirtemi ashi.

Civil defence ajanga ashiba agi, yasüng civilian tem aliba ki toku aser süki nung bomb pokloktsü aser item ki o jen raksaba agi nembanga alirtemi teyari meshiba liasü.

Beit Lahia nunga smoke bombs, artillery shelling aser tanks tem aliba tenük kuli alirtemi ashi.

Israel mitkar temi Gaza north nung kiralongrar indang ki o jen bushia raksatsütsü operation tenzuka lir aser tesüiba anogo ishika tsüngta kiralongrar aika tepsetogo ta ashi.

Israel-i March ita nungi asendenshir north Gaza amakba nung ibai tesashitiba alitsü.

Iba lendong ataloker Beit Lahia nungi Jabalia-i jena aor Basheer al-Ghandour-i osangbener dang ashiba agi, yasüng nüburtem mejanga lia ajungbena pokloktsü tenzük.

"Tesem ajaklen nungi aru - tayimtsü amshia amakba aser warships. Künur ki chirepogo. Yangji nisung 25 liasü," ta pai ashi. Iba kidang nisung 11 yiru aser pongu tepset ta pai ashi.

Yangji alirtemi ashiba agi, anasa aliba Israeli positions nungi mezüng smoke bomb mereploktsü, iba sülen artillery shelling kanga sashia liasü.

Ajisür tanks tem Beit Lahia anüolen Al-Salateen kiyong leni nungboka ait.

Tenük kuli alirtemi ashiba agi, Israeli armoured vehicles temi school ka lungbang, kong rara mechi tesem balala nungi pei ki yutsür arua jenokba civilian noklang dak tema liasü.

Israeli aircraft ajanga Hokulbarnep north Gaza nung tesem kar nungi tekeraba nung nüburtem ainshitsü shia aliba leaflets tem tsükdaktsü.

Iba totuyuba agütsüba ajanga nüburtem mulungjang nung tetsübo ait, shirnok rara tenzüker aiben tesem balala melenshia jenoka senzür. Nisung aika taolen maka.

Brehostibarnü Gaza south tsütsü Israel-i tayimtsü amshia amakdang nisung 120 dak tema

tepsetba sülen ano Gaza north tsütsü amaker.

Hokulbarnü IDF ajanga ashiba agi, parnoki anogo shika tsüngta Gaza tesem ajunga nung "terror targets" 150 dak tema makogo aser yangji anti-tank missile posts, military structures aser IDF sepai anema kiralongra mapa inyaktsü sentong yangluba tesemtem dena lir.

Israel sorkari Gaza nung operation ulushitsü aser Hamas-i khen atema ceasefire magizükra aser Hokulbarnü tashinung pua alirtem ajunga mechiokra Gaza Strip tanaben amokbangtsü nangzuka lir.

Doha nung yimjung ken o jembiba nung takok angutsü teimla mali aser Arab mediators temi mapang tali meshir.

Israel aser Hamas tsüngta January ita ceasefire ka yanglu, saka Israel-i March ita Gaza nung tayimtsü amshia amak tenzükshiba ajanga iba ceasefire raksa.

Iba den ano Israel-i chiyongtsü densema humanitarian aid kecha iba linük telungi meyoker, koba UN, European aser Arab linüktemi aitsür.

MULUNGNEN O



ASO
28.06.1972

ASÜ
12.05.2025

Onoki teti meima aser akum agütsüa aliba asür **REPATUSHI PONGEN G.B (Ungma)** pa shirang tenzukba anogo nungi akumli tempangba mapang tashi, temeimer kija aser lokti balala ana aser talang nungi shirnokisa asüku lemsatepba den rongsen, nubu, sarasadem aser shisatsü tajung agi onok mulung süneptaktsüa yaritepogo, nenok mapa tajung asoshi onoki tsüngtong arua pelaba meshitet nung iba sabang ajanga nenok ajak tang pelaba lemsateper. Nenok temeim mapa onok mulungjang nung teti alitsü aser kodanga mamatsü.

Onoki nenok nem kecha lepa magütsüteter saka takar Tsungremi nenok ajak maneni moajangma ta aji onok tamang sarasadem.

Temeim Kinungtsü, Chimur, Anukapang aser Kinungertem.



OFFICE OF THE
MOKOKCHUNG TOWN CHUCHUYIMLANG
SENSO TELONGJEM
Mokokchung - 798601: Nagaland

TENÜNGSANG AGÜTSÜR

Kr. Tiawapangla, asür Wb.Imnachuba aser Wt.Toshizüngla. Imsong na jala, lai NPSC, Common Educational Examination (CESE) 2024 nung Assistant Professor B.Ed. College (Pedagogy of English) jenjang nguteta tenüng tajung bener aru nung, Mokokchung Town Chuchuyimlang Senso Telongjem ajanga tenüngsang aser tetushi tulu agütsür.

Tsüngremi la taküm aser wadang maneni moaja, takokma nung len aniangma.

Sdl/-
T. YANGER PONGEN
PRESIDENT, MTCST



Sdl/-
M. TALI LKR
SECRETARY, MTCST

West-i India aser China toktepdaktsütsü meranger: Lavrov



Moscow, Monupii/May 16 (Agencies): West-i India aser China tsüngta mangatettep adokdatsütsü meranger, ta Russian Foreign Minister Sergei Lavrov-i tai tongloktsü.

"Culture without Borders: the Role and Development of Cultural Diplomacy" diplomatic club senden ka nung jembidang, Asia-Pacific region nung West tasa ya Asian linük ana tsüngta mangatettep adokdaktsütsüa yanglua lir, ta Sergei Lavrov-i ashi.

"Asia-Pacific region nung tang atalokba reprangdang, koba West ajanga tenzuka Indo-Pacific region nung anti-China orientation tejangja policy agütsür - aser asen tembar tajung aser kidanger India aser China rara adokdaktsütsü imlar," ta Sergei Lavrov-i ashi.

Asia nung ASEAN inyakyim West-i raksatsütsü meranger

aser alima nung danga tesemtem nung ama Western colleagues-i yangia tongti shilem aginer, parnoki ASEAN indang tongti mapa raksatsüner, koba küm aika ajak asoshi tapet liasü, ta Russian Foreign Minister-i ashi.

Paisa, West-i lungjemdaktsütsü melen ASEAN züngsem kar yimjak nung mesüzüktsü meranger ta ashi aser Eurasia nung security arrangement ka atema lungjemtsü ayongzük.

"Eurasia ama danga continents mali, kong civilisations aika külemi tangatettep nung alir...aser kasa mapang continent-wide structure maliba continent ji Eurasia dang lir," ta pai ashi.

Pahalgam nung kiralongrar temi nisung aika tepsetba tayang kepzuka Indian Armed Forces-i Pakistan aser Pakistan-occupied Kashmir telung nung kiranglongrar ki o jen amakba ya tesasatsüka lir ta China-i ashiba sülen Russia Foreign Minister-i iba o ya ashi.

Kiralongrar mapa atema Beijing-i Pakistan balaka maitüsü aser region nung tesunep alitsü mechi India aser Pakistan dang tensa tamajungba mekumdaktsütsü ajungshia liasü.



Noksa nung aliba Nagaland Sepaktakraw Senior women team ya May 19-24, 2025 anogotem Diu, UT of DNH & DD nung ayongzüksü aliba Khelo India Beach Games 2025 nung shilem agitsü renema lir. Nagaland team ya team coach Puleno Neikha-i anir senior women players 12 lir.

Italian Open: Sinner semis tongogo, Gauff final tongogo

Rome, Monupii/May 16 (Agencies): Brehostibarnü Jannik Sinner-i Casper Ruud madak straight sets 6-0, 6-1 agi takok ngua Italian Open tennis asayamung semi-finals tongogo aser Coco Gauff-ia China tsür Zheng Qinwen den set asem asayar tetsür final tongogo.

America tsür Gauff ya Honibarnü Italy tsür Jasmine Paolini den final asayatsü. Gauff aser Zheng na ghonda asem ser tesadang dak tali asayar 7-6 (7/3), 4-6, 7-6 (7/4) agi koka liasü.

Sinner ita asem doping ban nungi meyipa shilangba sülen Rome nung Ruud ya tetendanger tesashitsüba asütsü imla liasü, kechiaser Norway nungba ya ita tetenzüklen Madrid nung takok anguba sülen form nung aru.

Taoba asaya tem nunga Sinner ya junga masayateter ama liasü, shiba taoba küm March ita clostebol aliba putetba ajanga World Anti-Doping Agency ajanga asayamung nung shilem magitsü tenokdangba agütsüba pai agizüka liasü.

Ajisüaka arishi küm 23 tain Sinner yagi seed trok buba nung alisang Ruud madak

ghonda ka dak tera tali asayar akok.

"Ni tanü court nung jangratema bilema liasü. Asenoki ajaki ngur alitsü. Tanü ni bilemba ya kü atema teimla kanga tajung lir... Ni junga asayaogo. Court nung junga senzüteter, anungji iba atema ni kanga pelar," ta Sinner-i ashi.

Kasa anogo mezüing asaya nung Hubert Hurkacz madak 7-6 (7/4), 6-3 agi akoksang Tommy Paul-i Italy nungba Sinner ya Hokulbarnü last-four asayaba nung kechi agi soita ayutsü ta süngmanga alitsü.

Spain nung Carlos Alcaraz ya Hokulbar nikongdang semi-final danga ka nung Lorenzo Musetti den asayatsü.

Taoba mapang US Open asayamung takok ngudanga alila Gauff-i Olympic gold medallist Zheng madak tan agi asember straight match nung takok ngua liasü.

Arishi küm 21 tain Gauff ya Madrid final nung Sabalenka-i tsüingdaksüba sülen tan season nung takok marok mezüingbuba ajungkettsü mangdang lir, aser lai Italy tsür Paolini den final asayatsü.

"Ni kidangi aotsü renema lir

ta kü sasa ni kü dang ashi. Talisa ammag nung junga asayatsü ni atema tasak liasü. Ni tezü atang, kechiaser lai ni comfort zone alema oa asayadaksü," ta Gauff-i asaya temer ashi.

Seed trok buba nung alila Paolini ya Foro Italico final atonger Italy tsür tasembuba aser la indang doubles partner Sara Errani-i 2014 nung Serena Williams madak takok anguba sülenbo mezüingbuba alitsü.

Semi-finals nung arishi küm 29 tain Paolini yagi Peyton Stearns madak 7-5, 6-1 agi takok ngua liasü aser 1985 küm Raffaella Reggi sülen Mediterranean linük nung tetsürtem rongnungi Rome nung takok angur mezüingbuba akumtsü maongka lir.

"Iba jenjang tongtetba ya maongka tulu lir. Ni tennis asayatsü menur ang junga ashi, saka nisung ajak pei lenmang lir. Kar kera tain akumer aser kar menur akumer," ta Paolini-i ashi.

Paolini yagi iba asayamung kija aser tetsür tarep takok angutsü akok, kechiaser Errani tenati Hokulbarnü semi-finals nung Mirra Andreeva aser Diana Shnaider den asayatsü lir.

Man United nungi Maguire, Onana, Dalot nungeri Mumbai semdangtsü

Mumbai, Monupii/May 16 (Agencies): Tyre yanglur Apollo Tyres ajanga tang Manchester United nungi football asayar Harry Maguire, Andre Onana aser Diogo Dalot nungertem India-i anir arutsü, aser parnok indang flagship grassroots football sentong season pongu buba United We Play 2025 semzüksütsü.

Apollo Tyres ajanga tang iba team nungi asayarterm linüki anir aruba ibai tanaben buba alitsü. Parnok ajanga December 2022 nunga David De Gea, Anthony Elanga aser Donny van de Beek nungeri Goa semdanga liasü.

United We Play programme indang season pongu buba atema inyakyim tenzüksütsü

asem semzüksü atema tang Manchester United nungi asayar asem ya Mumbai nung May 29 nü alitsü. Parnoki tang mezüingbuba India semdangba mapang Apollo Tyres indang grassroots football initiatives den külemi Club bhukumer aser fans tem ajurutsü.

Manchester United-i yariba United We Play ya pan-India nung football asayar lanurtem nem parnok sempet sayutsü asoshi sapang agütsütsü atema Apollo Tyres ajanga tenzükba sentong ka lir. Iba ya ajanga football asayarterm maneni asayatsü ajungmesotsü, parnok amshitsü aser global training methods angazükdaksütsü nükjiding lir.

Iba mapang virtual

Manchester United Soccer Schools training sessions ajanga pan-India yimti 18 nung aser coaches 100 dak tema shilem agia liasü. Iba den külemi iba sentong ya Kathmandu, Bangkok, Dhaka aser Dubai densema Asia Pacific aser Middle East regions nung aliba yimtitem nung tenzükogo, ta pai ashi.

Manchester United indang goalkeeper Andre Onana-i, "United We Play season tasenba tenzüksü aser tarutsü putu stars asoshi iba saisapong temaba jenjangi ajungkettsü atema India nung nisung ajak den ajuruteptsü yongya atar. Yangji fans tem angutsü yongyar aser parnoki tashi angaa bhukumba asoshi pelaba lemsateptsü," ta ashi.

Bengaluru nung Boxing SuperFight Series III asayatsü

Bengaluru, Monupii/May 16 (Agencies): Pro-boxing Super Fight Series tasembuba ya Sunburn Union, Bengaluru nung Deobar aonung tenzüksü, kong professional boxing super lightweight division nung WBA Asia Middle East title asoshi India nung Faizan Anwar aser Ghana nung Kpakpo Allotey asayatsü.

Grassroot Boxing and Crown Boxing Promotions ajanga ayingzükba edition tasembuba jakdang Bengaluru (November 2024) aser Bangkok (February 2025) nung ayongzüka liasü.

Iba aonung bouts 10 alitsü, kong international matchups pezü aser WBA Asia Middle East title clashes ana alitsü.

Kolkata nungi Faizan Anwar

aser Ghana nungi Kpakpo Allotey na tsüngtepba kisüing masü co-main event nung Ukraine nung Danylo Honcharuk-i Dagestan nung Ruslan Kamilov den tsüngteptsü aser tetsürtem rongnung Belarus tsür Aleksandra Sitnikova aser India tsür Rani Devi tsüngteptsü lir.

Ano Ritesh Singh Bisht, Kavinder Singh Bisht, Vanlalawmpuia, F Zoramchhana aser Bengaluru nung alir aser yangji training agir Kamla Roka, Rohit Choudhary, aser Harsha Saroha nungera shilem agitsü.

International stars Ramanthan Mpagi (Uganda) aser Ruslan Kamilov (Russia) nungera iba aonung fight card nung lir.

INDIA OSANG :

Tapak 3 nungi...

Chhattisgarh nung tang mezüing yim...

Tawa item yim nung light mesangoktsüba sülen yimdaklirtem tepela nung benjungtepogo.

"Yim kar nung tanurtem tepela nung tsüngsangtep aser taintemi firecrackers poka pelatep, kechiyong parnoki küm aika light mesangoktsü atema kanga yongyaa liasü," ta ketdangser kati metetdaksü.

Item yim 17 nung kibong 540 nungi tang tashi nung

kibong 275 nung light mesangoktsüogo aser tanüingba kibongtem nungjia light mesangoktsüdar, ta paisa metetdaksü.

Manpur-Mohla-Ambagarh Chowki district ya state yimtiba, Raipur nungi kilometer 150 shi pilar lir. Iba district ya Maoists telungpurtem amenoka aliba Bastar region anasa lir aser Maharashtra kübok Gadchiroli district den arrtsülen lir.

KHRISTAN OSANG :

Tapak 5 nungi...

Chhattisgarh nung Khristan 45 dak züka...

April 25 nü Khristan kibongtem jagi local police station kati oa ken o benokogo, ajisüaka tang tashi police-i bushisüingdang masür.

Police-i Khristanem dang yimdaki meyipa maotsü asoshi tekümdangtsü metetdaksü, saka tang tashi aibelenerbo shinga mapu.

Khristan kibongtem den yariteper Khristan ka, Santosh Markam-i, "Ketdangsertemi Khristanem dang tensa mesüingjem tashi yimdaki tou ta shiogo, ajisüaka Khristanem tang tashi temeden kecha mangur," ta metetdaksü.

Tang tashi Khristanemji Chintalnar Arogo Tenla ki anasa süki ka nung jenoka lir, ajisüaka tsüngsang-mopung majungba agi parnoki timtem ajangshir.

April ita tetenzüklen Chhattisgarh state nung Sukma district nungsa Karigundam

yimdak nungia Khristan kibong tenet aridoka liasü. Yimdaklirtemi Khristan kibong ajak jaoka Khristan yimsü tokjang ta tuyu, ajisüaka Khristan kibong tenetibo Khristan yimsü toktsütsü memelungba agi yimdak nungi meindoka liasü.

Karigundam yimdak tatalokba osangji social media nung prokshiba sülen sorkar ketdangsertem den Central Reserve Police Force (CRPF) sepaitemi Khristan kibongtemji yimdaki tanaben meiner ao aser yimdak yimsüsürtem dang tarutsü nungbo yamaji meinyaktsü tekümdangtsü metetdaksü.

India nung kanga tezülen aliba aser terenlok maliba tesemtem rongnung Sukma District densema lir. Sukma region nung shilem 65 bo arem lir aser nütsüing shilem 85 tribal nisungtem lir.

BILEMDANGANG

"Hon mapang masüba nung agütsüba dang nungibo long mapang shitak nung onzüka yokbaji taoba."